

OMAIRA BRITTEN 25 AÑA SKIRBIENDO PA SU PUEBLO

Awe Omaira Britten ta cumpli 25 aña cu e ta skirbiendo su poesianan pa e pueblo Arubano.

Mi ta corda cu e tempo ey, mi a wordo bisa: "Juby, tin un netchi mucha delega ta puntrando pa bo".

Mi contesta tabata: "Si e ta mahos mes, lague pasa".

El a drenta y mi a bise: "No bisami... yiu di Dr. Britten!" y e contesta tabata si.

Su tata, Sr. Lorenzo V. Britten, tabata conoci como Dr. Britten, un escritor y politico cu tabata hopi conoci na Aruba. Mama di Omaira tabata Esperanza Farayans cu tambe tabata conoci cerca hopi hende.

Omaira tabata e nr. 3 di familia di 6 yiu y awe ta un mama orgullosa di su dos yiu: Shamaira di 7 aña di edad, Emanuel di 4 aña di edad y di su esposo Sr. Rafael Rodriguez.

Ora mi a hayami cu e jufrouw aki mi dilanti, mi di cune: "no bin yena mi cabes cu canto y baile ni di 'The Golden Treasures', e agrupacion musical mas popular e tempo ey, rivalnan grandi di 'T.M. 5'".

No, Omaira a acercami cu un schrift algun di su poesianan.

Mi a tuma mi tempo lesa nan, bao di observacion fiho di Omaira cu e expresion di "kico e lo bisami?"

Mi a pone e schrift abao, y a bise: "Juf, bo tin talento, no tira esaki afo. Bo tin cu siña formanan di skirbi y no keda pone frase bao di otro usando palabranan pa loco djies pa nan rima. Poesia tin hopi mas aden. E tin bo sentimentonan di felicidad y tristeza, bo pensamentonan, cu bo kier transmiti pa otro y cu un mensahe".

Ora cu el a bisa cu ta pesey el a bini, mi a saca un mapa mustre un 30 poesia di mi mes cu nunca mi a publica, y nos a perde tempo conversando riba esaki.

E problema di e cantante, bailarín di school di Iris Bernabela, tabata cu el a haya un encargo cu el a sinti cu tabata difícil pe.

Omaira mester a traha un poesia pa un Sra. Gomez di Noord, relaciona cu fallecimiento di esposo di e señora.

E tabata tin su notanan, y mi a mande cas cu algun idea cu e por combina cu e notanan. Despues di algun ora el a bolbe.

Omaira Britten a logra su prome poesia dedica na un difunto.

Su prome poema a wordo publica su dia siguiente y esey a bira tambe e prome paso di su carera di **Poetisa di Pueblo**.

El a cuminsa haya peticion pa skirbi pa tur sorto di ocasion, y continuamente e tabata bishitami pa un opinion, te cu mi a bise.

"Omaira, bo no tin nada mas di siña di mi. Bo ta riba bo mes cu un estilo unico. Lo unico cu bo mester haci ta sigui, y na mes momento profundiza bo mes mas riba e tereno aki".

Mi a relate entre otro di Tip Marrug, Charles S. Corsen, Pierre Lauffer, Antoine Maduro, Henry Habibe, Cola Debrot, Federico Oduber, Hubert Booi, Julio Maduro, Lolita Euson cu di chiquito a guiami y tratami como su yiu hunto cu su yiu Julio.

Mi mester por tabata tin un influencia chiquito pasobra awe ta un di e poetisanan mas stima di nos isla. El a skirbi pa tur sorto di ocasion te dia cu su tata a fallece.

Cu tur su dolor el a sinta dedica letternan, palabranan, y frasenan riba papel na su tata y e "obra" cu a sali a conmove hopi hende na Aruba y na Corsow.

Pastoor Erkamp cu tabata amigo di familia Britten den Dominicanessenstraat banda di Misa San Francisco a manda mensahe di elogio pe y tambe e popular por bisa afamada poetisa y escritora di Corsow Sra. Amacia.

Casi diariamente Omaira ta haya encargo pa skirbi un poesia pa hende. Por ta pa recorda un difunto, un enamorado, invitacion pa ricibimento o casamento, y den publicacionnan por mira esaki aña tras aña.

Omaira a impone su nomber como poetisa, pero esey no tabata tur, e mester a declara tambe.

E prome biaha cu el a ser pidi pa declara, el a dicidi di declara un obra di Sr. Hubert Booi y despues un di dje. Su obra a cay na agrado y a kibra tambe e "muraya di temer" cu tabata construi rond di Omaira. El a bira declamadora tambe.

Todopoderoso a duna Omaira e don di skirbimento, e don profundo di un arte difícil, un tereno caminda cu inspiracion ta di esencial importancia.

Su pueblo a acepte y stime y ta algo cu mi por a ripara aña tras aña.



Omaira a skirbi su Isla Natal, el a siña conoce hopi hende, y hopi hende tambe a busca pa siña conoce. Cu tur su amore ta dedica tempo na cada un, y nunca a cobra pa ningun di su inspiracionnan. "No tin placa pa paga e amor cu boso ta dunami" e ta bisa nan.

Un di e personanan cu e ta aprecia masha hopi ta "Fedaj" Sr. Federico Kock cu un dia a elogio den un di su poesianan, un di e poesianan cu awe ta graba den profundidad di corazon di Omaira pa e humildad y sinceridad di "Fedaj".

Omaira ta un admiradora grandi tambe di Sra. Lolita Euson (q.e.p.d.) Lolita cu tabata duna Omaira hopi consejo y semper bu bunita palabranan.

Omaira tin un espacio grandi tambe den su corazon pa DIARIO cu semper a publica su obranan, y pa Carmen Herrera cu a pcura pa e por a haya espacio den revista "Focus" tambe pa su obranan, y TV Guide di Sr. Dirks.

Su mama Doña Esperanza (q.e.p.d.) tabata su gran admiradora, consehera y amiga, y kende semper el a admira. Su admiracion pa su tata Rafael tabata e corahe y inteligencia di Sr. Lorenzo "Dr." Britten. Su esposo Rafael ta un di su yiu: Shamaira y Emanuel, su tesoronan di mas grandi pa kendenan e ta biba, pero su amor di mas grandi ta Papa Dios cu e ta adora y biba pe.

E ta stima su pueblo cu semper a comparti un poco di nan cu ne pasobra si no tabata pa su rumannan awe e lo no a yega 25 aña dren-

skirbi pa su amiganan en- amora, prome cu el a dicidi di profundisa su mes.

El a pasa den su periodo cantando cu varios grupo musical, prome cu el a cuminsa dedica su mes seriamente na skirbimento.

Tres siman pasa mi a pidi Omaira pa un portret di dje di 25 aña pasa, y un actual cu of sin su yiu:nan.

El a puntra ta pakico, y e contesta tabata: "Den tempo di computer aki, nos mester di portret di personahenan pa file. Mi ta falta portret di bo pa e parti di literatura".

El a trece e portretnan pa mi, y ora cu mi a kere cu awe mi por a sorprende, a resulta cu el a sorprendemi -- manera ta su customber-- riba mi cumpleaños caba.

Omaira, mi no tin cu expresa e sentimentonan cu mi tin pa bo persona pasobra sin palabra mes bo sa esey. Pabien, y sigui cu bunita tarea di Dios.

Juby